

Namminersorlutik Oqartussat terianniat illersugaanerat piniagaanerallu pillugit nalunaarutaat

Piniarneq aallaaniarnerlu pillugit Inatsisartut inatsisaanni nr. 12, 29. oktober 1999-meersumi § 2, imm. 4, § 8, § 9, imm. 2, § 12, § 13, imm. 2 aamma 3, § 17, imm. 2, § 18 kiisalu § 21 kingullermik Inatsisartut inatsisaat nr. 1, 16. maj 2008-meersukkut allanngortinneqartoq aamma Pinngortitamik illersuineq pillugu Inatsisartut inatsisaanni nr. 29, 18. december 2003-meersumi § 5, § 35, § 36, imm. 2 kiisalu § 60, imm. 2 naapertorlugit aamma piniarneq pillugu siunnersuisoqatigiit tusarniaaffigereerlugit aalajangersarneqarput:

Atuuffi

§ 1. Nalunaarut manna Kalaallit Nunaanni issittumi terianniat (Vulpes Lagopus) illersugaanerannut piniagaanerannullu atuuppoq.

Nassuiaatit

§ 2. Issittumi terianniat nalunaarummi matumani teriannianik taagorneqarput.

Eqqissisimatitsineq aamma piniarneq

§ 3. Terianniat Kalaallit Nunaata Avannaani Kangianilu Nuna allanngutsaaliukkatut Immikkoortitami eqqissisimatitaapput.

Imm. 2. Terianniat Kalaallit Nunaata sinnerani piffissami 15. maajimiit 15. septembari ilanngullugu eqqissisimatitaapput, taamaattoq imm. 3 takuuk.

Imm. 3. Imm. 2-mi aalajangersagaq tunngaviginagu terianniat nalunaarutip uuma atuutilerneraniit inoqarfiit, savaateqarfiit aamma qimmeqarfiit eqqaanni ukiuni tallimani inunnit atuuttumik inuussutissarsiutigalugu imaluunniit sunngiffimmi piniarsinnaanermut allagartalinneq ukioq kaajallallugu piniqqusaapput.

Piniariaatsit

§ 4. Teriannianik piniarnermi taamaallaat qoorortuut atoqqusaapput, sulloqqortussutsit akuerisat minnerpaaffiat .17-iuvoq.

Imm. 2. Qoorortuut eqiinnartakkat eqittaannartakkallu atornissaat inerteqqutaavoq.

Imm. 3. Qoorortooq sunaluunniit imm. 1 malillugu teriannianik piniarnermut atoqusaasoq nakersarneqarsimassaaq paarilluagaallunilu.

Imm. 4. Toqunartut, nammineq seqqortussiat, kiisartut, nigarsiniutit, teriannianilluunniit uninngatitsiniutitut teknikkikkut atortut allat atoqusaanngillat, taamaattoq § 12 takuuk.

Assartuutinik motorilinnik atuineq

§ 5. Timmisartut, qulimiguullit assartuutillu motorillit, soorlu qamuteralaat aamma ATV-t, teriannianik piniarnermi malersuinermilu atornissaat inerteqqutaavoq, taamaattoq § 12 takuuk.

Pisanik tunisineq aamma tunniussineq

§ 6. Terianniat inatsit malillugu pisarineqartut tuniniarneqarsinnaapput. Taamaattorli terianniat unioqqutitsisumik pisarineqartut imaluunniit unioqqutitsilluni pisisat neqaat, amii, kigutaat taakkuluunniit ilaat tuninissaat tunniunnissaallu inerteqqutaavoq.

Terianniamik pissatamik toqutsineq

§ 7. Terianniamik aallaannittup terianniap eqqorneqarnermi kinguinnguagut toqusimanera qulakkiissavaa.

Imm. 2. Terianniaq pissanneqarsimappat piaarnerpaamik toqunneqassaaq.

Imm. 3. Terianniaq pissanneqartoq toqunneqanngippat, piniarnerup naammassineqarnerata kinguinnguagut Aalisarnermut, Piniarnermut Nunalerinermullu Naalakkersuisoqarfimmut imaluunniit piniarnermik nakkutilliisumut qaninnerpaamut nalunaarutigineqassaaq.

Imm. 4. Terianniamik pissanneqarsimasumik takunnittoqarpat, ajornanngippat toqunneqassaaq kingornalu Aalisarnermut, Piniarnermut Nunalerinermullu Naalakkersuisoqarfimmut imaluunniit piniarnermik nakkutilliisumut qaninnerpaamut nalunaarutigineqassaaq.

Imm. 5. Terianniamik toqungasumik siumuisoqarpat nikisinnagu qimanneqassaaq kingornalu Aalisarnermut, Piniarnermut Nunalerinermullu Naalakkersuisoqarfimmut imaluunniit piniarnermik nakkutilliisumut qaninnerpaamut nalunaarutigineqarluni.

Kommunimi ileqqoreqqusat

§ 8. Kommunimi ileqqoreqqusaliorneqat kommunalbestyrelsi killiliisinnaavoq aamma kommunip iluani nunaminertani aalajangersimasuni terianniarnermut malittarisassanik atuutilersitsisinnaavoq.

Imm. 2. Kommunimi ileqqoreqqusat Aalisarnermut, Piniarnermut Nunalerinermullu Naalakkersuisumit aalajangersarneqassapput.

Pisanik nalunaaruteqartarneq

§ 9. Teriannianik pisat aamma pissatat tamarmik ukiut tamaasa PINIARNEQ-mi ukiumoortumik immersuiffissaaq atorlugu imaluunniit www.sullissivik.gl-kkut nalunaarutigineqartassapput.

Imminut illersortariaqarnermi imaluunniit iliortariaqarnermi nalunaaruteqarneq

§ 10. Pinerluttulerineri inatsimmi maleruagassat malillugit immi illersortariaqarluni imaluunniit iliortariaqarluni terianniamik toqutsisoqarpat, terianniamik toqutisup tamanna kommunimi Sullissivik aqqutigalugu Aalisarnermut, Piniarnermut Nunalerinermullu Naalakkersuisoqarfimmut piaarnerpaamik nalunaarutigissavaa, taakkulu suliaq pillugu allassimasumik nassuiaasiussapput sumiiffik, ulloq aamma terianniap suaassusaa ilanngullugu.

Imm. 2. Aalisarnermut, Piniarnermut Nunalerinermullu Naalakkersuisoqarfik terianniat, perlerortut ilanngullugit, inoqarfinnut qaninngoortut imaluunniit inoqarfinnut pisut pillugit maleruagassanik allassimasunik atuutilersitsissaaq.

Uumasuteqarneq

§ 11. Terianniat, piaqqat ilanngullugit, Naalakkersuisut akuersiseqqaarnagit uumasuutigineqaqqusaanngillat, taamaattoq § 12 takuuk.

Immikkut akuersissuteqarneq piniarnermullu piumasaqaatit sukumiinerusut

§ 12. Aalisarnermut Piniarnermut Nunalerinermullu Naalakkersuisoqarfik ilisimatusarnermut, terianniaqatigiit naleqqussarnissaannut imaluunniit Kalaallit Nunaata piniagassatigut pisuussutaasa nalunaarsorneqarnerannut atatillugu nalunaarummi malittarisassat atuutsinneqannginnissaannik immikkut akuersissuteqarsinnaavoq.

§ 13. Aalisarnermut Piniarnermut Nunalerinermullu Naalakkersuisoqarfik terianniarnermut atatillugu piumasaqaatinik aalajangersaasinnaavoq, tassunga ilanngullugu terianniat ilaannik ilisimatuussutsikkut nappaatinillu misissuineranut atugassanik tunniussisarnissamut.

Pineqaatissiisutit

§ 14. Nalunaarummi matumani § 3-mik § 4-mik, § 5-mik, § 6-mik, § 7, imm. 2-4-mik, § 10, imm. 1-mik kiisalu § 11-mik unioqqutitsineq piniarnek aallaaniarnerlu pillugit inatsit malillugu akiliisitsinermik pineqaatissiisutigineqarsinnaavoq.

Imm. 2. Nalunaarummi matumani § 3, imm. 1-mik, unioqqutitsineq pinngortitamik illersuineq pillugu inatsit malillugu akiliisitsinermik pineqaatissiisutigineqarsinnaavoq.

Imm. 3. Pinerluttulerineri inatsimmi arsaarinnissut pillugu § 166 assingusumik atuuppoq.

Imm. 4. Terianniat taakkuluunniit ilaasa arsaarinnissutigineqartut qanoq atornissaat Aalisarnermut, Piniarnermut Nunalerinermullu Naalakkersuisoqarfimmit imaluunniit Naalakkersuisoqarfimmiit tamatumunnga piginnaatitaasumit aalajangiivigineqartassaaq.

Imm. 5. Nalunaarummi imaluunniit nalunaarut malillugu ileqqoreqqusani atuutilersinneqartuni akiliisitsinermik aalajangiinermut tunngaveqarpat, ingerlatseqatigiiffik inatsisitigut inuttut pisinnaatitaaffeqarteq pinerluttulerineri inatsimmi maleruagassat malillugit akiliisinneqarsinnaavoq.

Imm. 6. Akiliisitsissutiniit, imm. 1 malillugu aalajangersarneqartuniit, isertitat Nunatta Karsianut nakkartinneqassapput.

Atuutilersitsineq

§ 15. Nalunaarut manna 18. oktober 2019-imi atuutilerpoq.

Imm. 2. Peqatigalugu Kalaallit Nunaanni teriannissat eqqissisimatitaanerat pillugu Namminersornerullutik Oqartussat nalunaarutaat nr. 20 ulloq 17. Maj 1989-imeersoq atorunnaarsinneqarpoq.

Imm. 3. Namminersornerullutik Oqartussat nalunaarutaat nr. 20 ulloq 17. Maj 1989-imeersoq malillugu ileqqoreqqusat atuutilersinneqartut atuutiinnassapput, allanik ileqqoreqqusaliornikkut atorunnaarsinneqarnissaasa tungaanut.

Namminersorlutik Oqartussat, ulloq 18. oktober 2019

Jens Immanuelson

/

Jørgen Isak Olsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

